



KENYATAAN MEDIA **KEMENTERIAN PERALIHAN TENAGA DAN TRANSFORMASI AIR** **(PETRA)**

SISTEM BEKALAN ELEKTRIK NEGARA KEKAL STABIL DAN TERJAMIN

PUTRAJAYA, 15 MAC 2026 - Kementerian Peralihan Tenaga dan Transformasi Air (PETRA), sedang memantau secara rapi perkembangan semasa krisis geopolitik di Asia Barat, khususnya susulan penutupan laluan Teluk Hormuz oleh Iran pada 2 Mac 2026 yang telah memberi kesan kepada pasaran tenaga global. Walau bagaimanapun, perkembangan ini tidak menjejaskan tahap ketersediaan dan jaminan bekalan elektrik negara pada masa ini.

Sistem penjanaan elektrik di Semenanjung menggunakan sekitar 40% hingga 45% gas asli sebagai bahan api utama dan sebahagian besar bekalan gas tersebut diperoleh daripada sumber gas domestik di Kerteh serta kawasan pembangunan bersama Thailand–Malaysia *Joint Development Area* (JDA). Sehubungan itu, bekalan gas dalam negara pada masa ini adalah stabil dan mencukupi untuk menampung operasi loji jana kuasa.

Berhubung tarif elektrik, melalui kerangka *Incentive Based Regulation* (IBR) di bawah tempoh Kawal Selia Keempat (*Regulatory Period 4 – RP4*) dari tahun 2025 hingga 2027, Kerajaan komited melindungi kebajikan

pengguna daripada impak kenaikan kos bahan api global. Sebarang perubahan kos bahan api seperti gas dan arang batu akan diselaraskan melalui mekanisme *Automatic Fuel Adjustment* (AFA) pada setiap bulan berdasarkan pergerakan kos bahan api sebenar di pasaran.

Pada masa ini, pengguna domestik dengan penggunaan elektrik tidak melebihi 600 kWj sebulan dikecualikan sepenuhnya daripada pelarasan kos bahan api. Justeru, sekitar **85% pengguna domestik di seluruh negara tidak akan terkesan** dengan turun naik harga bahan api di pasaran antarabangsa, sekaligus memberikan kestabilan kepada perbelanjaan isi rumah.

Berdasarkan perkembangan semasa, kadar AFA diunjurkan kekal dalam keadaan **rebat sehingga April 2026**. Sekiranya kos bahan api global terus meningkat dan ketegangan di Asia Barat berlarutan, kadar AFA berpotensi untuk berubah pada bulan-bulan berikutnya.

Sejak Julai 2025, **tampungan subsidi yang telah diberikan oleh Kerajaan adalah berjumlah RM2,506 juta** yang disalurkan kepada pengguna melalui rebat bil elektrik sebagai insentif cekap tenaga. Bagi memastikan perlindungan yang berterusan, Kerajaan juga sedang meneliti langkah mitigasi tambahan sekiranya konflik di Asia Barat berlarutan sehingga memberi tekanan melampau kepada kos bahan api.

PETRA akan terus bertindak proaktif dalam mengimbangi keterjaminan tenaga dalam negara dengan keupayaan ekonomi pengguna agar tarif elektrik kekal pada kadar yang munasabah.

Sebagai langkah kebersamaan dalam mendepani situasi semasa, pengguna digalakkan untuk terus mengamalkan penggunaan elektrik secara cekap dan berhemah. Amalan jimat elektrik bukan sahaja membantu mengurangkan komitmen bil bulanan individu, malah ia

merupakan sumbangan besar rakyat dalam memperkukuh kelestarian sistem tenaga negara.

YAB DATUK AMAR HAJI FADILLAH BIN HAJI YUSOF
TIMBALAN PERDANA MENTERI DAN
MENTERI PERALIHAN TENAGA DAN TRANSFORMASI AIR

15 Mac 2026

Unit Komunikasi Korporat | Kementerian Peralihan Tenaga dan Transformasi Air (PETRA)
Tel.: 03-8000 8000 | E-Mel: ukk@petra.gov.my

